

LE NONCE

DV PEUPLE ^{comp}

FRANCOIS.

SVR LE SVIET DE LA
guerre contre l'Espagnol.

AV ROY.



Touxté la coppie Imprimée,

A PARIS,

*Chez Claude Griset, ruë des Amandiers,
à la belle Branche.*

M DC. XXXVI.

AVEC PERMISSION.

XIV 233608

Case

F

39

.326

1636 mon

THE NEWBERRY
LIBRARY

LE NONCE FRANCOIS.



IRE,

Comme Dieu a entrepris la conduite de vostre vie & de vostre Estat, il faut croire aussi qu'il ne l'a pas moins pris de vos armes, lesquelles sont auiourd'huy reconneuës si iustes & si necessaires de toute la Chrestienté, que quand on cōsidere leurs mouuemens & leurs succez, on les trouue si éloignez du cours ordinaire des choses, qu'elles font cognoistre assez clairement, & aduoüer à vos ennemis que ce n'est pas, à la verité, la querelle des hommes. Dés vostre enfance vous auez cōbatu l'heresie & la Rebellion, & chassé les factieux de vostre Royaume, que vous auez conquis: mais à present en cette action vous establissez non seulement vn repos certain & assure à vos suiets, estouffez les deffiances & les diuisions que l'Espagnol y auoit de tout temps nourries par les secrets Agēs: mais encor vous obligez tellement tous les Princes Chrestiens, mettant leur fortune au large & à franchises coudées, & les pauvres peuples opprimez, en leur ostant ce iour mal-heureux qu'il a mis sur leur col esclau, qu'il faudroit qu'il n'y eust point de iustice dans le Ciel, s'il n'y auoit point de recōpense pour la gloire que vous vous

A ij

ferez acquise, ny de raison parmy les hommes, si
 vostre memoire n'estoit reuerée iusques aux ex-
 tremitez du monde : Ce dessein n'est point con-
 traire au serment que vous auez fait à vostre Sa-
 cre à Rheims, d'auoir aussi-tost l'espée au poing
 que le Sceptre à la main, pour la protection de vos
 suiets, à l'exemple des Roys d'Epyre, qui à leur
 Sacre, apres vn solemnel Sacrifice, promettoient
 tout ayde & secours aux Epyrotes. La nature
 mesme vous y oblige, si le pere l'est enuers ses en-
 fans de les mettre à couuert de l'inuasion & de la
 tyrannie. Voila pourquoy les Perses auoient de
 coustume d'enuoyer tous les matins vn page au
 reueil de leur Roy, pour le sommer d'auoir soin
 des peuples que le Grand Mosoromaldes luy
 auoit commis, pour monstrier que le propre de la
 Royauté est d'estre tousiours en guet & en senti-
 nelle pour le tenir à l'abry de l'orage & du vent,
 & le garder des esclats & du foudre. C'est encore
 vn deuoir d'humanité & de consanguinité qui
 ne rauale point la reputation d'un Prince, de se-
 courir son semblable en son affliction, voire
 mesme de rachetter la liberté au prix de son
 sang & de sa fortune. Autrement ce seroit fai-
 re planche à l'vsurpation, mettre les Royaumes
 en proye, & en faire à la fin le legitime par-
 tage des brigans : Et qui a chausé au point où
 nous voyons à present cette Maiesté de Castille,
que le triomphe de deux Grands Roys qu'elle

a culbutez & traînez aux yeux de tous les Roys de l'Europe , sans qu'aucun ait iamais paré aux coups ny à la violence. Il vous importe, SIRE, qui estes auourd'huy l'arbitre de la Chrestienté, qui auez vn Royaume qui de tout temps a esté l'Autel commun, & le refuge des affligez en ce haut période de felicité où vous estes maintenâr, de resserrer sô mauuais humeur, mettre vos amis & les peuples hors & à l'abry de son ambition, qui ne s'assouuiroit pas d'un nombre infini de mondes , s'il en auoit autant qu'en Epicure.

Les qualitez actiues , à ce qu'on tient , sont meilleures que les passiuës. L'Espagnol bon mesnager de son profit , plus porté à son gain qu'à sa perte, aimant mieux le croissant que le declin ; pousse tousiours sa fortune en auant plustost que de la reculer à l'exēple de ce grand Alexandre son patron , qui ne mettoit iamais en compromis ce qu'il auoit outre-passé , rien que l'esperance del'aduenir. Il faut donc, SIRE, pour arrester le cours de son iniuste vsurpation , l'effort qu'il fait à la dissipation de vostre Royaume. à present que la mine de ses monstrueuses trahisons , qu'il a si long temps beschee, qu'il n'a plus ses esprits occultes, ie dis ses furets, ou plustost furies , qu'ils nourrissoit aux despens du Royaume, dans les entrailles de vostre Estat, qu'il fremit sous vostre Demon , qu'il voit entrer en quartier , & tout prest à porter le

feu & la foudre par toute l'Espagne, à present, dis-
 ie, qu'il est bourrelé de cette loy interne de la cō-
 science, de l'aprehensiō de sa tyrannie, de la resti-
 tutiō des brigādages de ses predecesseurs, que le
 Ciel vous roidit le bras, que la terre vous arme,
 que l'ocasiō vous fait les doux yeux, qu'il trem-
 ble de vos seules pēsees, que le droit est de vostre
 costé, que vous estes à cheual l'espee à la main,
 pour prēdre vengeance de l'iniuste detention de
 vostre heritage & de celuy de vos alliez; Il le faut
 SIRE, que cōme il a fait au pāsē herisser contre
 vous vos voisins, affermir sa paix au milieu de
 vos mouuemens, accreu son Empire, que vous
 luy fassiez de mesme pain soupe, en luy ren-
 uoyant comme Brasidas, le mesme traict dans
 le cœur dont il vous a faict la blessure, & don-
 nez a la tranquillité du Royaume vn fonde-
 ment semblable à ce Rocher Terragone, au
 milieu de la mer, immobile contre les ondes.
 Vous le pouuez; SIRE, en restreignant vostre
 valeur dans vostre courage, & vous animant de
 pāsions qui vous poussent à la vengeance & à
 legitime deuoir. Ouy si vous le voulez, mais en
 Roy enuironné de tout ce que vous auez de plus
 Geneueux & vaillant en tout vostre Estat tout
 flamboyant de rayons d'vne haute Maiesté, au
 milieu d'vne sanglante bataille, noyé du sang
 de vos ennemis, tuant & ruant ces grands
 coups de Bourbon, iusqu'à tant qu'ils soient

sans espoir de ressource. Vous avez vn Royaume
 florissant qui ne peut estre espuisé de richesses ny
 de soldats , vn Arcenal muny où rien ne deffaut
 pour l'attirail d'une Grande guerre , que faute de
 courage , semblable à celuy de Semiramis , qui
 bastissoit des villes, équipoit des flottes , & con-
 queroit des Royaumes en mesme temps. Au lieu
 que celuy de l'ennemy Catholique vostre en-
 nemy, fait à pieces & haillons , comme vn mes-
 chât pourpoint répli de paille, n'est qu'un desert
 sec & aride comme vne terre à clavier, où les sol-
 dats sont tousiours comme sauterelles , à ventre
 vuide & à mains crocheuës, comme on disoit de
 l'armée de Philopæmen , ne pouuant subsister
 que par vn mouuement rapide de tyrannie , &
 par l'aide de ses voisins, auxquels sa Couronne
 est auant engagée, qu'à peine les Indes peuuent-
 elles suffire à payer les interets , seulement.
 Que diroit donc le monde , si parmi tant de fa-
 ueurs que le Ciel vous eslargit, tant d'auanta-
 ges qu'il vous donne pour poursuiure vne si
 glorieuse entreprise , en la courante du progrès
 de vos affaires, conduits non par les mains d'un
 homme , mais d'un guide Diuin, sur le temps
 que vous luy pouuez faire voir d'où vient l'in-
 iure & l'offence, hors d'haleine & sans poulx,
 & prest à porter par terre, si vous ne cooperez
 avec le Ciel, si vous ne suiuez les mouuemens
 de sa Prouidence, la priere des peuples, les

larmes des oppressez ; En vn mot si vous vous lassiez de bien faire, & d'acheuer vne chose si iuste de foy, sinon que pour l'interest de vostre repos vous abandonnez la cause publique. Je ne doute point qu'il ne se trouue dans vostre Royaume des Ames si basses & reptibles, & des courages si apoltronis, pour auoir esté de tout temps à l'engrais du repos, comme pourceaux de bauge, ausquels le seul nom de guerre, fait la guerre, & le bruit des armes donne de l'effroy, comme on dit que le Hybou se cache plustost pour la crainte qu'il a de la lumiere, que pour le mal qu'il reçoit des autres oyseaux : ignorant les forces du Royaume, capable de conquerir le monde, s'il se pouuoit connoistre luy mesme, qui iugeront mon discours temeraire, tenant pour maxime qu'une mauuaise paix est tousiours plus auantageuse que la plus iuste gerre, quand elle seroit de celles d'Auguste, commandee des Dieux & approuuee des sages, comme celle cy, pour le maintien de son Estat, & la recoufse de son bien contre vn vsurpateur, ne reconnoissant pas son naturel auare & ambitieux, courant ses imperfections comme vn boiteux à cheual, & faisant comme ce Dieu de Placitiades de ses vices, & cependant tres-necessaire, quand elle ne cultiueroit que les deserts, & rendroit les pierres fertiles, estant la fin des mal-heurs, l'esperance des peuples, qui les

porte

porte au consentemēt & à l'obeyffance, au lieu que de la guerre ils vont au mespris & à la rebellion: Mais, S I R E, sans s'amuser à pénétrer si auant dans les circonstances de cette foible maxime toute cōtraire à vostre humeur: Iugez s'il vous plaist, si depuis le temps que vous auez endossé le harnois, vos suiets ont esté iamaïs plus soumis à vos volontez, si leur cœur a esté iamaïs plus ouuert ny plus resigné, & si c'est la consideration de l'interest particulier de ceux-cy, ou du public, ou de vostre seruice, qui les fait parler, puis qu'il n'est pas raisonnable qu'un Roy laisse perdre son Estat, pour ne le pouuoir pas secourir par les formes ordinaires, ny s'oblige à refuser vne chose que les Loix de l'equité, & la iustice luy demandent pour le bien & la seureté commune, estant mesme necessaire de faire mourir autrui pour demeurer en repos.

Au demeurant, l'Espagnol est-il entré iamaïs en traitté avec la France, que pour se mettre à couuert des orages, & la ietter dans l'escueil & le precipice? comme si l'Espagne ne pouuoit demeurer paisible que dans son travail, ny en seureté que dans ses desordres? Les desseins qu'elle a formez dans ses entrailles depuis la paix de Noyon & de Veruains, les factions qu'elle y a tracees sous beau pretexte d'vnion, & lors mesme qu'elle tesmoignoit le plus contribuer sa ioye au bon-heur de cette paix, ne iu-

stifient. ils pas assez combien dangereuse est ceste maxime, par l'antithese de ces deux Monarchies, naturellement ennemies cōme l'eau & le feu, qui ne subsistent, que par ceste contrariété de nature, d'esclairs, gresles & tonnerres. L'Histoire nous sert de fidelle tēsmoin quād elle nous represente sur son registre la peinture naïfue des actions de ces deux Royaumes, sous le regne de François I. Henry II. Charles IX. Henry III. Henry le Grand.

La decadence precipitée, dit-elle, de ce miserable estat presque par terre, estoit telle que quoy que nos ennemis fussent en sentinelle pour profiter de son debris, si est-ce que nonobstant ils tesmoignoient auoir quelque compassion de sa cheute, il n'y auoit que l'Espagnol ce bienne, qui faignant d'auoir le cœur touché de ses publiques calamitez que l'horreur ny l'aprehension de leur pauvre patrie ne pouuoit esmouuoir, comme s'ils eussent fait parti avec le destin du Ciel & l'Espagnol, de le déchirer & le mettre en pieces. Mais ce n'est encore qu'une copie de l'original, duquel, S I R E, si vous desirez voir quelques traits en leur naturel. prenez s'il vous plaist la peine de faire vne reuilion du vray controolle, depuis Louys IX. au mesme temps que cette malheureuse animosité prit sa naissance iusques au feu Roy vostre Pere, vous verrez cōme cette iniuste passion a esté depuis naturelle à cette maison de Castille, comme le

feu au caillou, s'estât prouignée de pere en fils, ainsi que le lierre parmy les mazures, sans aucun retour ny vicissitude, au contraire des autres choses, qui ont d'ordinaire leur declinaison comme leur accroissement. Et comme toutes les cruautéz, perfidies, horreurs, desolatiōs, qui furent employees depuis le berceau de ce pauvre Prince, iusques au coup parricide de sa mort; comme on dit, que Iunon employa tous les cruels monstres à la ruine d'Hercule; nos yeux l'ont veu & en ont ietté des larmes, nos cœurs des sanglots; mais nos langues ne l'ont sceu encore exprimer, pour verifier qu'un Prince genereux ne doit iamais faire paix avec son ennemy, qu'il ne l'ait laissé à mains vuides d'armes, & hors d'espoir de se releuer, & pour cette raison le grand Pompee ne voulut iamais recevoir les hōneurs de la victoire qu'il auoit acquise contre Domitius, iusqu'à tant qu'il l'eust defait à platte cousture, pour instruction aux Princes de mesnager leur seureté par leurs forces, & leur honneur par leur seureté: L'ennemy reconcilié estant du naturel du Lyon apprivoisé, qui peut retourner en son naturel, comme l'Espagnol qui ressemble à ces vlcerez malins qui s'enueniment par les medicamens. O que l'exemple de ce Roy de Lacedemone qui ne tenoit point tant à gloire d'auoir eslargi sa frontiere, de l'estendue de son ambition, que de ce que femme de son Royaume n'auoit veu

de son regne fumée ny camp d'ennemis, vous doit toucher viuement au cœur! (Si les actions des Princes sont pierres affiloirs pour aiguïser les âmes generentes) quand vous voyez ces cicatrices de vos pauvres subiets, que vous lisez ces riuieres de sang de leur sang, & vous representez que la France a esté autrefois comme les riuages des Syrenes toutes blanchies de leurs ossemens, qu'il vous doit animer de ressentimens comme pointes aiguës, pour prendre leur soucy & asscuer pour l'aduenir leur tranquillité, comme dans vne forte muraille hors d'escalade & de sape, ou bien dans les murs de Semiramis, comme on dit. Carthage estoit bien loïn de Rome, encorë fallut-il qu'elle sautast pour pacifier l'Italie. L'Espagne est contre vous **SIRE**, vous enuironne & serre les flancs de tous costez comme dans vne forte presse, ne la pousserez-vous pas pour oster ce triste obstacle de vos chaînes, & l'enuoyer des pieds en l'air? L'ombre de l'ennemi porte tousiours cõtation aussi pour reculer le danger il faut l'esloigner: les moyens en sont si faciles & si aisez, que pour le resserrer dans sa coque, il ne vous reuiendra pas en despence ce que la rebellion a cousté à chasser du Royaume. l'en appelle à ce grand ce puissant & Eminentissime, issu du pur sang de nos Roys, ce diuin Esprit par qui ioient tous les ressorts de vostre Estat, celuy qui au plus loïn de nos pensees a fait escart de la plus

part de vos ennemis, & les tient aujourdhuy en
 escher: Si ce n'est pas l'opinion que nous auons
 conceüe de sa grandeur qui, comme vn esclair,
 donne plus d'éblouissement que de lumiere, qui
 nous la fait admirer plutost que ses forces ny la
 verité, comme il y a eu autresfois des bestes qui
 ont esté adorees. Qu'on remarque, SIRE, aux
 atteintes que nos Roys vos predecesseurs lui ont
 donnees de temps en temps quād de gayeté de
 cœur ils luy ont voulu taster le poulx, si au seul
 bruit de leurs armes il n'a pas esté mené en Lié-
 ure, comme à ces chasses de Cyrus deuant leurs
 chiens courans, & qu'un Roy de Frâce est touf-
 iours en droit & en liberté de tirer la morve & le
 nez d'un Roy d'Espagne, au moindre humeur
 qui le prend: sous François premier, quoy qu'il
 eust toute la Chrestienté sur les bras, vn cadet de
 la maison de Foix ne porta-il pas dans quinze
 iours, comme en poste, ses armes victorieuses
 par toute la Nauarre & la Groigne iusques dans
 la Castille, avec vne telle espouuëte de ce Mar-
 ran, que peu s'en fallut qu'il ne se retirast dans
 l'Affrique? n'est-ce pas l'Espagne où ce sage Ro-
 main prenoit tous les iours vne ville, & ne peut
 iamaïs donner qu'une bataille? Et quoy encore?
 Les dernieres pensees du feu Roy nostre Pere,
 ne le mirent-elles pas en telle apprehensio, que
 comme on lit de Cassander à la veüe du tableau
 d'Alexandre, il en eust voulu estre quitte pour
 la fièvre, ou pour les Pays Bas? Que sera-ce donc

SIRE, quand ce ieune Nouice au fait des armes, à peine sevré pour les affaires du monde, & qui n'a iamais veu champ de bataille ny combat que par les oreilles, tousiours à l'ombre & au couuert fardé, cōme vn Demoiscl, en la mesme posture qu'Hercules chez la Reïne de Lydie, vous verra au haut des Pyrenées comme vn feu sortant de la nuë, esclatant en foudres & tonnerres, vous qui estes aujourd'huy plus redoutable que tous vos predecesseurs, qui vous estes acquis plus de gloire en vostre enfance qu'ils n'ont fait en toute leur vie, plus d'autorité sur vos subiets qu'ils n'ont fait de consentement, qui auez appris aux autres Roys à regner ce qu'ils ne sceurent iamais, & qui outre ces auantages auez vn Conseil fort & puissant & mieux stilé aux affaires du monde, qu'il prenoit auparauant qu'elles soient conceües, sc̃achant tout ce qu'ils ont ignoré, & qui ne peut faillir avec vous? Que sera-ce quand il se souuiendra qu'en pleine paix, à l'imitation de ses Peres, il a voulu troubler le Royaume, raur la fidelité des subiets, ramasser les mescontentemens iusques aux affectiōs domestiques diuisees par ses propres conseils, qu'il a desbauché le Lorrain, fait violer le respect & la foy qu'il doit à son Roy, dressé l'estendart de l'vnion cōme vne chimere, ou le blanc de ses iniustices, y pensant attirer tous vos Alliez, & la Saincteté mesme, sous ce nom Catholique? à l'exemple de Mithrida-

tes, qui traita ligue avec les Grecs, voyant l'accroissement de l'Empire Romain, & comme si vos mœurs auoient quelque rapport avec les vices, & que la France n'eust pas esté de tout tēps l'ancre sacré de l'Eglise Romaine: qu'il a encore forcé l'Empereur au pariure, luy ayant fait faire la paix avec le Turc, & prendre la protection de ceux dont il auoit iuré la ruine, pour vous opposer, & donner lieu à ses horribles desseins, qui comme vn fleuve grossi d'vne infinité de riuieres, sortant son riuage, rompt tout ce qu'il rencontre, deuoient emporter Villes & Provinces pour les ioindre à ce grand Empire d'vsurpation; Que sera-ce sinon ainsi que du Renard, qui apres auoir couru sa proye tout le lōg du iour, est cōtraint de la quitter à la veuē du Lion lors qu'il pense repaistre sa faim & se retirer dans son terrier? Aussi l'Espagnol desormais au dessous du vent & de l'orage qu'il a fait esleuer sur luy, ayant par tant de siecles couru apres la fortune de ses voisins pour assouuir son insatiable cupidité de la Monarchie du monde, quittera prise: & comme ces Bacchanales apres auoir fait leurs ceremonies sales & abominables disparoissoient & s'alloient renfermer, sonnera aussi tost la retraitte dans son Escorial, comme la prison que ses peres luy auront bastie. Mais voulez-vous, SIRE, sans paroistre hors de vostre Royaume, ny employer ces grands coups de Mars sur le dos d'vn ennemy qui ne fera que

fuir, luy faire voir, & à cette venteuſe chimere de confederez, que ce n'eſt qu'une quintaine d'Eſpagne, vne onde cõtre vn rocher, vne figure en l'air, & que comme l'ame au corps qui ſe trouue & paſſe en mille lieux, ſans toutesfois remuer ny bouger, que vous pouuez de voſtre ſeulement parolẽ, ce qu'ils ne ſçauroient faire avec les Indes, & des puiffantes armes: & combien que vous n'ayez que deux bras faits d'une meſme matiere que les leurs, nonobſtant ils portent ſi loin & ſi droit, qu'ils ne manquẽt iamais de frapper ſur les plus nobles parties d'un corps, quãd il paſſeroit d'eſtenduẽ l'une & l'autre mer. Et de fait, S I R E, Vous prend il enuie par gaillardife de leur faire reſſentir iuſques dans les eſprits vitaux, où ils peuuent porter, ſans vous mettre en peine que de le vouloir ſeulement. Il y a dans voſtre Royaume dix mille familles que libertins, qui pour eſtre nays dãs le libertinage & l'oïſiuetẽ, ſe ſont rendus ſi inutiles qu'ils ne ſçauroient viure que de proye & rapine à la foule du peuple, comme ſi cette profeſſiõ leur eſtoit vne perpetuelle vacation, lesquelz iettez hors ſe pourroient changer, cõme il y a des choſes qui changent de nature quand elles ſont transportees, & ſe rendre propre à voſtre ſeruite: Teſmoignez à cẽt Partifans de voſtre ville de Paris, qui depuis dix ans ſe ſont faits des montagnes d'or & d'argent, pour vn prodige de voſtre puiffance, que vous deſirez qu'ils dreſſent vne forte cõpagnie
de

de 50. associez des mteux accommodez & cimentez à vostre service, qui facent passer dās les pays & terres de l'Achayē & la Floridē, vne colonie de quatre à cinq mille de ces liberrins, conduits par des Chefs experimentez au fait de la guerre & de la Police pour l'y establir, escortée d'un bon nombre de vaisseaux armez & bien equippez, ce qui reuiendra à si peu de frais que dans cinq ans du seul commerce ils seront remboursēz de leur fonds, d'autant que le pays est si abondant en tout ce qui est propre à l'vsage & pour la vie de l'homme, & principalement aux lieux habitez, où elle peut prēdre pied sans cōtredit d'enneiny, que le Iardin des Phēaces décrit par Homere, ne fut iamais si fertile, n'estant besoin d'y porter, hors les munitions de guerre, & l'ehuitaillemēt pour l'embarquer, que l'espee & la cape seulement. Cēt aduis n'est point de moy, SIRE, vostre Maiestē scait que c'estoit l'intention du feu Roy vostre Pere, & eust esté exēcutée si la mort ne l'eust prēuenu. Lequel ne peut que produire trois choses. La premiere, l'institution de la Religio Catholique, la liberte de quantite d'ames fideselles nouuellement conuerties, & le maintien de ceux qui y sont desia establis. La deuxieme, vn auātageux commerce pour l'vtilite des subiets, & la mer libre d'un nombre infini de Corsaires. La troisieme, vne telle incommodite que vous rendrez à cette Flotte des Indes pour ses rasteschissemens que

vous luy osterez, qu'il faudra, outre les difficultez des passages gardez par les Hollandois, ou qu'elle perisse, ou qu'elle se fortifie ou se munisse, comme disoit Philippe de Macedoine, parlât de l'attirail d'une grâde armée, iusqu'à la moindre necessité; & par de si grâdes despences qu'elles surpasseront la recepte, qui est iustement la frapper en cette partie mouuante qui fait mouoir, & agir toutes les autres, qui n'enuoyera plus le sang aux veines, les esprits aux arteres, ny les arteres aux petits rameaux du corps, lequel se delaisant aussi tost comme vne Anathomie ou corps mourât, vous quittera maintenant la Nauarre, ores la Flandre, tantost la Franche Compté, & puis l'Italie. Cette secôde Castille autrefois le suiet de nos tragedies, & maintenant le theatre des folies de nos ennemis, laquelle au lieu de tenir ses affectiôs à l'egal & en equilibre & se ressouuenir que la France l'a retiree de tout temps de la presse des afflictiôs, gardé ses Pontifes comme les Oyes du Capitole, s'est renduë auiourd'huy mercenaire de l'ambition d'un Tyran, mise à la solde de ses passiôs, & dôné mouuement à ses tyrannies, iusqu'à vouloir solliciter la terre & le Ciel à vostre ruine, & faire de vous comme d'une Corneille d'Esopé. Le droit des Princes qui est le droit fondamental des Estats qu'elle doit equitablement maintenir par honneur, ne le veut elle pas violer par faueur; & le droit de nature? comme si l'experience & l'au-

thorité de la Cour de Rome, que ie separeray
 tousiours de l'Eglise, estoit quelque chose de pl'
 grand que toute la sagesse de Salomon, ny toute
 celle de l'antiquité. Je m'en rapporte à cette sa-
 crée Messagere du passé, à ce qu'elle nous a fide-
 lemēt rapporté d'Adonias, pour servir de patrō
 & de guide aux autres Princes pour l'aduenir.
 Mais, SIRE, ce n'est pas d'aujour d'huy qu'elle en-
 treprēd sur le droict temporel de vostre Royau-
 me, que sa colere est allée iusqu'à la personne de
 nos Rois, qu'elle a dispensé les sūiets de leur ser-
 ment, mis la Courōne à l'encherē, & reduits à la
 loy de leurs propres sūiets, cōme si vous n'estiez
 pas au dessus de la Loy, vrays Lieutenās de Dieu
 en terre, arbitres de la vie & de la mort, & Roys
 Sacrez eternellement selon Melchisedech, c'est
 à dire independans de toute superiorité que de
 celle de Dieu, & tout cela pour s'affermir, & ad-
 uancer tousiours cette Maiezté Catholique, tout
 ainsi que le Roy d'Egypte qui faisoit pousser sa
 vie en despit du destin. Et nonobstant cette pau-
 ure Frāce attachee cōme vne miserable Andro-
 mede à la cadene de ses passions, luy a tousiours
 donné son suc & son sang, & cōme ce malheu-
 reux Asne de Lucian, au triomphe de la Deesse
 Isis, luy a presté son dos pour porter par le mon-
 de l'image de ses trophées, vray Idole des hom-
 mes. O que Philippes le Bel sceut bien monstrier
 qu'il estoit digne de porter sceptre, quand il luy
 fit voir qu'il ne tenoit sa Couronne que de Dieu

& de son espee, & qu'il ſçauoit bien faire diſtinction du ſpirituel avec le temporel, & maintenant l'honneur de la France ſe faiſant reconnoiſtre pour Roy abſolu par tout où la nature l'auoit fait naiſtre Roy! Je m'explique, & diſ, que ſi l'Aigle & ſes aiſles d'ambition portēt ombre à ſa Saincteté, que Rome luy ſoit ſuſpecte, & à tous les Princes hânis, que ſa dignité n'y puiſſe eſtre ſouuerement exercée, que la Chreſtiété a raiſon (puis que vos eſtes auourd'huy diſpenſé des loix de l'Egliſe par la neceſſité) d'exiger de voſtre Maieſté vn lieu qui ne ſoit ny ſuſpect aux Rois ny aux peuples, & où ſa Saincteté puiſſe agir en liberté aux choſes purement ſpirituelles ſans toucher aux Sceptres, ny aux Diadomes, ſinon que par compromis, comme Pere cōmun, eſtant tres iuſte que celuy que le ſus Chriſt a fait chef de ſon Eglife viſible, quant au ſpirituel, pour prendre ſoin du plus important de tous ſes ouurages, qui eſt l'ame, & luy departir les richèſſes du Ciel, y exerce vne puiſſance qui approche de la ſienne, & en eſtat de n'eſtre plus troublée ni menaſſée. Vous y auez vn notable intereſt, en ce qu'il tient le ſerment de fidelité d'vne partie de vos ſuiets, tiré des deniers de voſtre Royaume, plus que de tous les autres enſemble, & qu'il y nourrit vn nōbre de creatures ſous le voile de Religion aux deſpens du public, & pour fortifier les eſprits d'effians, iuſques ici retenus par l'apprehenſiō de la tyrannie de cette fatale Maiſon, & des ſupplices

de ce tygre de l'Inquisition, & les faire rentrer dans l'Eglise par le mesme endroit qu'ils en sont sortis: au moins d'establi, si cen'est le saint Sie-
 ge, vne seconde personne qui ne soit separee de la Saincteté que pour se tirer de ceste malheu-
 reuse oppression, & couper la teste à cet Hydre que nous voyons renaistre cōme vne furied'En-
 fer des l'essence de Philippes & Charles son pe-
 re, par des ligues abominables d'vniō, qui n'ont point encor esté venē en l'Eglise Romaine. Que
 iedie, SIRE, qu'il vous est importāt, puis que vous auez entrepris sa ruine, écrite de la main des An-
 ges, cōme le iugement, & que vous devez faire iouyr le Royaume d'vne felicité semblable à ces
 Hyperborees, & establi la paix generale partou-
 te la Chrestienté qui sera vne action digne à la
 verité d'vn Roy de la Fleur de Lys, à quoy Dieu vous a destiné de tout temps, pour vous faire as-
 seoir sur l'ancien Throsne de Charlemagne, où il n'y auroit point de veritables augures: ce qui se
 connoist par les aduantages qu'il vous a donnez par dessus tous les autres Roys, ie diray bien le
 reste des homes. Vous auez trop de connoissan-
 ce de vous mesme, SIRE, pour penser que ie vous vueille flatter, ny fortifier mes pēsees de choses
 qui nous sont encore inconnuēs, & qui se passent entre Dieu & vous: & quād nous ne suiuiōs seu-
 lement que la plus cōmune opinion, & la portée de vostre iugement, n'est il pas vray que Dieu
 n'a iamaistiré de la force de vostre vertu, cōme

de la puissance de la matiere se tire la forme des actions si parfaites, que pour s'en seruir en des occasions importantes comme celle-cy, où il y va du salut vniuersel, & pour vëger toutes les iniures que vos predecesseurs ont iamais receuës? Ce qui secõfirme par les apparëces & par le propre témoignage de vos ennemis. mais ce n'est pas tout, SIRE, que le Ciel ait fait choix de vo^{us}, qu'il vous ait orné de toutes ces belles parties de grandeur, de prudëce, de valeur & de magnanimité; nourry en esperãce de tãt de cõquestes, il est questiõ de vous mouuoir & vous former vne ame de bonne haleine, qui vous anime à la douceur de ces rares qualitez, ainsi qu'Alexandre s'animoit aux chansons de Minerue, estant le propre de la Royauté d'estre tousiours en action & iamais en repos, à l'exemple du soleil, qui cõmence par où il finit sa carriere, si le Prince est braue & courageux, il doit estre tousiours à cheual & prest à repartir sur l'iniure, si sage à pouruoir & remédier aux deffauts de l'Estat, si genereux, d'autãt plus porté au ressentiment, quand l'honneur est pris à partie & qu'on l'engage à vne nécessité de se deffendre. Or aujourd'huy, SIRE, que vous voila piqué iusques au sang, qu'il vous importe de vostre honneur, du bien de vostre Royaume, & de celuy de tant de pauures Princes desheritez: Que tout ce qui est de roide & nerueux en toute l'Europe s'est esleué contre vous & s'est mis à la luitte, non sur l'esperance de vous vain-

cre par la force des armes, mais vo^r faire flechir aux charmes d'une paix hôteuse, & semblable à celle que Xerxes donna aux Babylonniens pour les punir, comme si vous estiez venu au monde pour passer vostre vie en oisiveté, & donner vostre esprit en proye aux delices & à la volupté? ne faites-vous pas rampart de courage cōme de vengeance & d'un desir brulant de combattre, comme Achille en Homere? ne resoudes vous pas en sãg tous les desseins de vos ennemis? & n'espüferez-vous pas plustost celuy de vos veines à la ruine de leur tyrannie? Ouy, Sire, si vous vous representez de voir deux grands Princes en l'âge de quatre vingts ans, proprement sur le couchant de leurs iours sur le champ de bataille, tous verdoyans de Lauriers: l'un pour tirer raison de ses ennemis, qui luy auoient vsurpé une ville; l'autre pour rendre les dernieres preuues de son affection à sa chere patrie, & tous deux pour estre honorez seulement des trophées d'une grande victoire apres leur mort. Or il n'est pas question icy seulement, SIRE, d'une ville ny d'un Royaume, aussi peu d'un triomphe que d'une victoire: Il y va de tout vostre honneur, de la Monarchie du monde, des Autels de Dieu, de ses Sacrifices, & de ses oracles, plus veritables que celuy Damon qui se trouua menteur. Vous le ferez aussi, SIRE, cōme vous avez un cœur de Lyon inuincible, & d'une autre trempe que celuy de Phocien & d'Agésilas, qui se laisse

aisément toucher à la compassion de la misere publique, & à la douleur des pauvres Princes bannis, qui tous vous conuient au conuoy des funerailles de leur liberté. Mais fureur qui vous les fera accrocher des pieds & des ongles, & plüstost s'il le faut arracher des mains de la Prouidence, le compas & la regle, pour faire entrechoquer la France avec l'Espagne. Je vous atteste, ou que vous soyez esclaves, bannis, desheritez, victimes miserables de la cruauté de Castille; Je vous atteste ceste parole de mon Roy, sa resolution inuiolable comme son cœur, & que la vertu que vous avez employee iusques icy à combattre vos desplaisirs & vos peines, seruira maintenant à moderer vos contentemens & vos ioyes, quand ce ne seroit que cōme les Macedoniens, de voir cēt autre Alexandre assis sur le throsne de Darius. Et vous Ange bien-heureux, Astre du flux & reflux de nos affaires, le guide & la caution de mon Roy, maintenant que les hommes & les elements sollicitent la terre & le Ciel à la vengeance de ce formidable ennemy, n'esleuez vous pas son ame à ces grandes & genereuses actions, qui comme cette trompette des ieux Olympiques, l'appellent à la gloire; & si elle estriue; ne la poufferez vous pas par vn vent en poupe du Ciel, non à eriger par vne enfileure & qualitez de plusieurs campagnes arides & deserts ramassez comme vn meschant bastiment de diuers & chetifs matereaux, ainsi que son ennemy, despoüille sur despoüille; mais vn trophée eternal, tiré par abregé de ses victoires (puis qn'il est promis de l'eternité) qui approche de celuy de Iesus Christ, de toute la terre.

Greco 527. F I N.
Ms. de 12. IV. 90.